

खबरां

- प्रधानमंत्री नरेंद्र मोदी होरें ग्लोबल साउथ गी सशक्त बनाने लेई ए.आई दे लोकतांत्रिकरण दा आह्वान कीता ऐ, कई विश्व नेताएं दी मजूदगी च अज्ज उनें नमीं दिल्ली च भारत ए.आई इम्पैक्ट शिखर सम्मेलन दा उद्घाटन कीता।
- प्रधानमंत्री होरें अज्ज नैतिक ते समावेशी ए.आई आहले नजरिए “मानव” दा अनावरण कीता ते आखेआ कि ए.आई गी सांझा करियै गै दुनिया दा फैयदा होई सकदा ऐ।
- फ्रांस दे राष्ट्रपति इमैनुअल मैक्रों होरें भारत दे डिजिटल ढांचे गी दुनिया च बेमसाल करार दिंदे होई एहदी सराहना कीती ऐ।
- प्रधानमंत्री नरेंद्र मोदी ते अबू धाबी दे युवराज बश्कार मलाटी च दपक्खी सहयोग बधाने बारै गल्लबात होई।
- मुंगेर च खीरी थेआरबंद माओवादी दे आत्मसमर्पण दे कन्नै बिहार राज्य नक्सलवाद मुक्त घोशित।
- सुप्रीम कोर्ट नै अज्ज आखेआ ऐ जे लोकें गी मुक्त रेयोडियां बंडने दिएं स्कीमें करी देश दी आर्थिक तरक्की गी नुकसान पुज्जदा ऐ, राज्यें गी मुफ्त पैहा बंडने दे बजाय रोजगार देने दी सलाह दिती।
- आई.सी.सी टी-20 विश्व कप दे सुपर एट मकाबले दा कार्यक्रम जारी। अज्ज वेस्ट इंडीज नै इटली गी ते .. नै .. गी हराया। कनाडा ते अफगानिसतान बश्कार मकाबला एल्लै चला करदा ऐ।



PM-AI

प्रधानमंत्री नरेंद्र मोदी होरें नवाचार गी बढ़ावा देने, समावेशता गी मजबूत करने ते मनुक्खी कद्रें गी कन्नै लेइयै अगड़े बधने आहले ए.आई भविक्ख दे निर्माण पर जोर दिता। अज्ज दिनें भारत ए.आई इम्पैक्ट शिखर सम्मेलन च नेताएं दे पूर्ण सत्र गी संबोधत करदे होई मोदी होरें आखेआ कि जिसलै प्रौद्योगिकी ते मनुक्खी कद्रें कन्नोकन्नी चलडन तां गै ए.आई दा असल असर दुनिया गी लब्बोगा। उनें आखेआ कि ए.आई गी लेइयै भारत दी सोच ते रौंऽ पूरी चाल्ली साफ ऐ जे ए.आई समूलची मनुक्खता दे सांझे फायदें लेई इक निग्गर जरिया बनाना लोडचदा, कई विश्व नेताएं दी मजूदगी च भारत ए.आई इम्पैक्ट शिखर सम्मेलन दा रस्मी तौरा पर उद्घाटन करदे मौके उनें ग्लोबल साउथ गी सशक्त बनाने लेई ए.आई दे लोकतांत्रिकरण दा बी आह्वान कीता। फ्रांस दे राष्ट्रपति इमैनुअल मैक्रों, इस सम्मेलन च हिस्सा लैने आए दे दुनिया दे केई बड्डे राश्ट्राध्यक्षें च शामिल न, उनें भारत दे डिजिटल ढांचे गी दुनिया च बेमसाल करार दिंदे होई एहदी बड़भू मती सराहना कीती ऐ।



PM-Leaders

प्रधानमंत्री नरेंद्र मोदी होंरें आखेआ ऐ जे ए.आई तकनीक सारें आस्तै असान होनी चाइदी ते हर देश दा इयो लक्ष्य होना चाइदा। अज्ज इंडिया ए.आई इम्पैक्ट समिट च नेताएं दे पूरे सत्र गी संबोधित करदे होई श्री मोदी होंरें आखेआ जे ए.आई गी साफ मानवीय मूल्लें ते मार्गदर्शन दी जरूरत ऐ। उनें आखेआ जे महत्वकांक्षी भारत दी वैश्विक यात्रा च ए.आई दी बड्डी भूमिका ऐ। इतिहास गी दिखदे होई मनुक्ख नै हर रूकावट गी इक नमें मौके च तब्दील कीता ऐ। प्रधानमंत्री होंरें आखेआ जे अज्ज लोकें सामने इक बारी दोबारा ऐसा मौका आया ऐ। उनें भगवान बुद्ध हुंदे शाश्वत ान पर जोर दिदे होई आखेआ जे भारत ओहू भूमि ऐ जित्थे भगवान बुद्ध होंरें ज्ञान प्राप्त कीता हा ते एह दुनिया आस्तै शांति ते ज्ञान दा प्रतीक ऐ। उनें भगवान बुद्ध हुंदे शब्दें दा हवाला दिंदे होई आखेआ जे सेही कर्म सेही समझ थमां जन्म लैंदे ना।

<><><><><><>

V.P AI Summit

उपराश्ट्रपति सी.सी राधाकृष्णन होंरें आखेआ ऐ कि इंडिया ए.आई इम्पैक्ट शिखर सम्मेलन च प्रधानमंत्री नरेंद्र मोदी हुंदे आसेआ दित्ता गेदा भाशण आर्टिफिशल इंटेलीजेंस दे प्रति भारत दे दूरै दे नजरिए ते जिम्मेदार सोच गी दर्शांदा ऐ। इक सोशल मीडिया पोस्ट च उपराश्ट्रपति होंरें आखेआ कि प्रधानमंत्री हुंदे आसेआ प्रगट कीती गेदी मनुक्खता दे नजरिए पर आधारित सोच मनुक्खता गी तकनीकी विकास दे भलेआं केंद्र च रखदी ऐ। उनें आखेआ कि नवाचार, समावेशिता ते नैतिक सुशासन कन्नै ए.आई दा इस्तेमाल भारत दी तरक्की ते बदलाव आहली इस प्रौद्योगिकी दे भविक्ख गी आकार देने च भारत गी विश्व गुरु दे रूपै च स्थपित करा करदी ऐ।

<><><><><><>

Reddy Minerals

केंद्री कोयला ते पेट्रोल मंत्री जी. किशन रेड्डी होंरें कुल संसारी अर्थ बवस्था गी आकार देने च महत्वपूर्ण खनिजें दे बधदे महत्व पर लो पाई। उनें आखेआ कि सौर उर्जा, लिथियम ते ताम्बे पर आधारित टेकनालजिएं दा आधार मुख्त तौरा पर खनिज गै हैना। अज्ज नमीं दिल्ली च आयेजित इक कार्यक्रम दरान बोलदे होई उनें एहू गल्ल आक्खी। महत्वपूर्ण खनिज टिकाउ भविक्ख दी बुनियाद विशे पर आधारित इस विशेस सत्र दे उद्घाटन मौके मंत्री होंरें आखेआ कि दुनिया दा भविक्ख इनें महत्वपूर्ण संसाधनें दी दस्तयाबी ते टिकाउ विकास पर निर्भर करदा ऐ।

<><><><><><>

Modi-Nahan

प्रधानमंत्री नरेंद्र मोदी होंरें अज्ज नमीं दिल्ली च भारत ए.आई इम्पैक्ट शिखर सम्मेलन च अबू धाबी दे युवराज शेख खालिद बिन मोहम्मद बिन जाययद अल नाहयान हुंदे कन्नै दपक्खी गल्लबात कीती। विदेश मंत्रालय नै जानकारी दित्ती ऐ कि मलाटी दरान दौनें नेताएं दपक्खी सहयोग बधाने पर सलाह-सूत्र कीता ते बक्ख-बक्ख क्षेत्रें च होई दी प्रगति पर संदोख प्रगट कीता।

<><><><><><>

Bihar Naxal Free

बिहार हुन पूरी चाल्ली नक्सलमुक्त होई गोआ ऐ। राज्य दे अखीरले हथियारबंद माओवादी सुरेश कोड़ा नै मुंगेर च आत्मसमर्पण कीता। मुंगेर दे पुलस उप महानिरीक्षक राकेश कुमार होरें दस्सेआ जे राज्य च पूर्व च नक्सल प्रभावित रेदे 23 जिलें च हुन कोई बी हथियारबंद नक्सली दस्ता सक्रिय नेई ऐ। मुंगेर दे जिलाधिकारी निखिल धनराज निपपीनीकर होरें आखेआ जे केंद्र सरकार दी आत्मसमर्पण ते पुनर्वास नीति दे तैहत सुरेश कोड़ा गी तय लाहू तौले गै दोआए जांगन। सुरेश कोड़ा दी घरै आहली प्रोमिला देवी नै आत्मसमर्पण दे फैसले पर खुशी जाहिर करदे होई आखेआ जे परिवार च हुन राहत ते सुकून दा माहौल ऐ। बरे 2012 च राज्य दे 23 जिले नक्सल प्रभावित हे। 70 दे दाहके च बिहार च नक्सल गतिविधिं दा असर तेजी कन्नै बदेहा हा, खासकरिए मध्य बिहार दे जिले मते प्रभावित रेहा।

<><><><><><>

NHRC Notice

राष्ट्रीय मानवाधिकार आयोग - एनएचआरसी नै सारे राज्यें ते केंद्र शासित प्रदेशें दे मुख सचिवें ते पुलिस महानिदेशकें गी नोटिस जारी कीता ऐ। नोटिस च आयोग दे नां दा गलत इस्तेमाल करिए आम लोकें गी भ्रमित करने आहले गैर-सरकारी संगठनं – एन.जी.ओ .दी पन्छान करने लेई आखेआ गोआ ऐ। एनएचआरसी मूजब किश एनजीओ आयोग दे भ्रामक पन्छान पत्रें ते ओहदे दे नाएं दा इस्तेमाल करा र दे ना। आयोग नै आखेआ ऐ जे इस चाल्ली दे भ्रामक नाएं दा इस्तेमाल कन्नै रपे पैसे गलत इस्तेमाल दी संभावना बदी सकदी ऐ। राष्ट्रीय मानवाधिकार आयोग नै सरबंधित अधिकारियें गी दो हफते दे अन्दर अन्दर कानूनी कार्रवाई करने दा निर्देश दिता ऐ, जिसदे च नियमें दी खिलाफवर्जी करने आहले दा पंजीकरणें गी रद्द करना बी शामिल ऐ। एनएचआरसी नै कर्नाटक ते दिल्ली दे मुख सचिवें दे क्रनो कन्नी कर्नाटक दे पुलिस महानिदेशक ते दिल्ली दे पुलिस आयुक्त गी बी एनजीओ खिलाफ कीती गेदी कार्रवाई दे सरबंध च दो हफते दे अन्दर रिपोर्ट पेश करने दा निर्देश दिता ऐ।

<><><><><><>

Shabrimala-Gold Case

केरल च कोल्लम विजिलेंस कोअर् नै शबरीमाला सुन्ना मामले च त्रावण कोर देवस्वोम बोर्ड दे साबका अध्यक्ष ए पदमकुमार दी जमानत अर्जी पर अपना फैसला टाली दिता ऐ। पदमकुमार नै 90 दिनें दी हिरासत पूरी करने दे बाद वैधानिक जमानत लेई अदालत च अर्जी दिती ही कीजे मंदरै दे भित्तै दी चगाठ पर लग्गे दे सुन्ने दी चोरी मामले च अजे धोड़ी आरोप पत्र दाखल नेई कीता गेदा ऐ। अजें कि इस मामले च जमानत मिलने दी सूरतै च बी उनेंगी हिरासत च रौहना पौग कीजे शबरीमाला मूर्ति सरबंधी इक होर मामले च बी ओहू न्यायिक हिरासतै च ना।

<><><><><><>

Pak Gas Blast

पाकिस्तानी दे कराची शैहरा च अज्ज इक गैस धमाके च इक रिहायशी ईमारत ठेई पेई जेहदे च 9 बच्चें समेत 16 लोकें दे मारे जाने दी खबर ऐ। एह धमाका सोल्जर बजार इलाके च होआ। खीरी जानकारी थोने तगर कोई 2 दर्जन लोकें गी मलबे हेठा जींदा बाहर कड्डियै इलाज लेई अस्पताल पुजाई दिता

गेदा ऐ। राहत ते बचाव कम्म तेजिया कन्नै जारी हे। पिछले म्हीने बी कराची च गै इक शापिंग माल च अगग लगने दी घटना च 80 लोकें दी जान चली गई ही।

<><><><><><>

SC Freebus

सुप्रीम कोर्ट नै अज्ज आखेआ ऐ जे लोकें च मुफ्त रेयोडियां बंडुने आहली पिरत कन्नै देश दे आर्थिक विकास च रूकावट आवा करदी ऐ। प्रधान नयाधीश जस्टिस सूर्यकांत ते जस्टिस जाँय माल्या बागची ते जस्टिस विपुल एम. पंचौली हुंदी पीठै आखेआ ऐ कि मुल्ले दे ज्यादातर राज्य माली खसारे दा सामना करा करदे न पर फ्ही बी विकास दी अनदिक्खी करियै इस चाल्ली दियां पिरतां जारी रक्खा देन। एह गल्ल अदालतै तमिलनाडू बिजली बंड निगम लिमिटेड दी याचिका पर सुनवाई करदे होई आक्खी। याचिका च आखेआ गेआ ऐ जे उपभोक्ताएं दी आर्थिक हालत पर ध्यान दित्ते विजन सभनें गी मुफ्त बिजली देने दी पेशकश कीती गेदी ऐ। पीठै आखेआ ऐ जे राज्यें गी मुफ्त राशन, साइकल ते बिजली देने दे बजाय रोजगार पैदा करने दा कम्म करना लोडचदा। एहदे च आखेआ गेआ ऐ कि राज्य विकास योजनाएं पर कम्म करने दे बजाय मुफ्त रेयोडियां बंडियै फजूलखर्ची करा करदे न। अदालतै आखेआ कि इसै चाल्ली मुफ्त चीजां बंडी-बंडियै कम्म करने दी अदात खत्म होआ'रदी ऐ ते जिसलै कुसै गी मुफ्त च राशन ते सुविधा सेवां थहोडन तां एहदे नै मुफ्तखोरी दी आदत लोकें च पैदा होग जेडा विकास दी बत्तै च रोड बछाने आंगर ऐ। पीठै आखेआ कि कल्याणकारी उपाएं तैहत भलेआं गरीब लोकें गी जेकर मुफ्त बिजली दिती जा तां एह किश हद तगर ठीक ऐ पर अमीर ते सोखे लोकें गी बी मुफ्त बिजली देने दी कोई तुक नेई बनदी। उनें आखेआ कि छडा जनता गी खुश करने दे मकसद कन्नै इस चाल्ली दे फैसले देश दी तरक्की दे हितै च नेई ऐ।

<><><><><><>

ICC T-20 World Cup

आई.सी.सी टी-20 विश्व कप क्रिकेट च सुपर ऐट दे मकाबले तैय होई गए न। गुप वन च भारत दक्खन अफ्रीका, वेस्ट इंडीज ते जिम्बाब्वे गी रखेआ गेआ ऐ जिसलै जे गुप टू च इंगलैंड, न्यूजीलैंड, पाकिस्तान ते श्रीलंका दियां टीमां न। एह 8 टीमां शनिवार थमां सेमीफाइनल च अपनी थाहर बनाने लेई खेडंगन। हर गुप थमां अब्बल दो टीमां सेमीफाइनल खेडंगन। तोआई इस चैंपियनशिप च अज्ज बी त्रै मैच खेडे गो। पैहला मैच कोलकाता च वेस्ट इंडीज ते इटली बश्कार होआ जेहडा वेस्ट इंडीज नै 42 रन कन्नै जित्तेआ। पैहले बल्लेबाजी करदे होई वेस्ट इंडीज नै 165 रन बनाए ते परते च इटली दी पूरी टीम 18 ओवरें च छडे 123 रन गै बनाई सकी। दूआ मैच कोलम्बो श्रीलंका ते जिम्बाब्वे बश्कार खेडेआ गेआ। श्रीलंका नै टास जित्तियै पैहले बल्लेबाजी करने दा फैसला लैता ते 20 ओवरें च 7 विकटें दे नुकसान पर 178 रन बनाए। परते च जिम्बाब्वे नै 19 ओवर ते त्रै गेंदें 4 विकटें दे नुकसान पर 182 रन बनाए ते इस चाल्ली जिम्बाब्वे नै एह मैच 6 विकटें कन्नै जित्ती लैता। अज्ज दा त्रीया मैच चेन्नई च हुनै कोला किश चिर पैहले 7 बजे कनाडा ते अफगानिस्तान बश्कार शुरू होई चुके दा ऐ। कनाडा नै टास जित्तियै पैहले बल्लेबाजी करने दा फैसला लैता ते हुनै कोला किश चिर पैहले अफगानिस्तान नै 5.3 ओवरें च 1 विकट दे नुकसान पर 47 रन बनाई लैते दे हे।

<><><><><><>

Maha Shivaji Jayanti

महाराष्ट्र च छत्रपति शिवाजी महाराज हुंदी जयंती मते उत्साह कन्नै मनाई जा'रदी ऐ। मुख्खमंत्री देवेन्द्र फडनवीज होरें इस महान मराठी योद्धा दी जन्मभूमि शिवनेरी किले च आयोजित जन्मोत्सव च हिस्सा लैता। उपमुख्खमंत्री एकनाथ शिंदे ते सुनेत्रा पवार होर बी इस मौके पर मजूद रेह। फडणवीस होरें किट्टै गी संबोधित करदे होई आखेआ कि छत्रपति शिवाजी महाराज होरें इक ऐसे साम्राज्य दी स्थापना कीती जित्थै सभनें दा सम्मान कीता जंदा हा। अपने शासनकाल च पानी ते जंगलें दे प्रबंधन, सखल्ली टैक्स बवस्था ते नौसेना ते समुंद्री किलें दे निर्माण च छत्रपति शिवाजी हुंदे आसेआ कीते गेदे कम्में गी बी मुख्खमंत्री होरें उजागर कीता।

<><><><><><>

Fisherman

श्रीलंका दी जेल थमां रिहा कीते गेदे 11 मछेरे चेन्नई पुज्जी गे ना। इन्दे चा 4 मछेरे रामनाथपुरम दे न जिसले के दुए 7 नागपट्टिनम ते मयिलादुथुराई जिले दे ना। श्रीलंका दी नौसेना नै इनेंगी पिछले बरे जुलाई च अंतरराष्ट्री जलक्षेत्र च घुसपैठ करने दे आरोप च गिरफ्तार कीता हा। इनेंगी भारती आव्रजन अधिकारिएं गी सौंपेआ गेआ हा।

<><><><><><>